

Visoki predstavnik iznio svoj stav u vezi sa ostavkom Mirka Šarovića na funkciju u Predsjedništvu Bosne i Hercegovine

Afera "Orao" – izvoz oružja u Irak – je nanijela više štete međunarodnom ugledu Bosne i Hercegovine nego ijedan drugi događaj nakon završetka rata, rekao je danas visoki predstavnik, Paddy Ashdown. Visoki predstavnik se obratio novinarima nakon što je Mirko Šarović objavio da je podnio ostavku na funkciju u Predsjedništvu Bosne i Hercegovine kako bi preuzeo odgovornost za aferu Orao.

Visoki predstavnik je rekao da je otkriće SFOR-a od 7. marta ove godine da postoje jasni dokazi da je Vojska Republike Srpske špijunirala bh. organe vlasti, susjedne države, ostale zemlje i međunarodne organizacije koje djeluju u Bosni i Hercegovini pojačalo štetu koju je nanijela afera Orao.

Ovim aktivnostima se "jasno i ozbiljno prekršio Daytonski sporazum i Upute zapovjednika SFOR-a stranama, na kojima se temelji mir i stabilnost ove zemlje," rekao je visoki predstavnik. "Nije pretjerano reći da su ove aktivnosti mogle ugroziti stabilnost ove zemlje."

Visoki predstavnik je rekao da obje ove afere ukazuju "na isto pitanje političke odgovornosti i potpuni nedostatak adekvatne civilne kontrole nad bosanskohercegovačkim oružanim snagama."

"Gospodin Šarović je bio predsjednik Republike Srpske kada je VZ Orao potpisao ugovore za isporuku oružja sa Irakom, što je u direktnoj suprotnosti sa rezolucijama Vijeća sigurnosti

Ujedinjenih naroda. Imajući na umu rat koji se trenutno vodi u Iraku, u koji je, moguće je, uključeno naoružanje izvezeno iz ove zemlje, ne mogu dovoljno istaći ozbiljnost ove afere," rekao je visoki predstavnik dodavši da je gospodin Šarović također bio predsjednik Republike Srpske kada je Vojska Republike Srpske špijunirala građane BiH, SFOR, međunarodnu zajednicu i susjedne zemlje.

Visoki predstavnik je istakao da je "u oba slučaja, po Ustavu RS gospodin Šarović bio viši zvaničnik koji je imao političku odgovornost u ovim pitanjima.

Visoki predstavnik je pozdravio odluku gospodina Šarovića da "prepozna svoju objektivnu odgovornost po ovim pitanjima i podnese ostavku u interesu RS i BiH." On je rekao da je ovo bio "častan čin koji postavlja standarde za političku odgovornost koje se BiH treba pridržavati ukoliko želi da postane dio Euroske demokratije."

Visoki predstavnik je dodao da ostavka gospodina Šarovića "dozvoljava BiH da zatvori ovo poglavlje i nastavi sa reformama."

Visoki predstavnik je rekao da su institucije BiH odgovorne za odabir nasljednika gospodina Šarovića, te je izrazio želju da se to uradi što je prije moguće.